

# Radeljaš više nije ministar

Čelnik Stranke za bolje Goražde Esed Radeljaš ostao je bez još jedne od nekoliko funkcija na kojima je bio posljednjih godina, a nakon što je pravosnažno osuđen za prevaru i krivotvorenje dokumenata.

Skupština Bosansko-podrinjskog kantona (BPK) smijenila ga je sa pozicije ministra privrede u tom kantonu na inicijativu poslanika iz četiri stranke. Radeljaš je za ministra privrede u BPK imenovan u januaru 2015. godine.

Prethodno je bio zastupnik u Skupštini Kantona Sarajevo (KS) i vijećnik u Općinskom vijeću Novi Grad ispred Bosanske stranke BOSS, delegat u Domu naroda Federalnog parlamenta, te predsjednik Upravnog odbora Zavoda zdravstvenog osiguranja Kantona Sarajevo. Pravosnažna presuda Vrhovnog suda Federacije BiH koja mu je 2005. izrečena zbog prevare i krivotvorenja dokumenata nije bila prepreka da obavlja sve ove političke i javne funkcije.

Kako je Centar za istraživačko novinarstvo (CIN) već pisao, jednogodišnju zatvorsku kaznu koja mu je određena nije izdržavao jer je u presudi bilo navedeno da se zove Esad, a ne Esed. To je formalno značilo da nije riječ o istoj osobi i dok je greška ispravljena nastupila zastara izvršenja kazne.

---

Novac za zdravstvo u rukama prevaranta

Na isti način Radeljaš je prevario i biznismena Mehu Mušića od kojeg je posudio novac. Na potvrdi o zajmu novca potpisao se kao Esad Radeljaš. Novac nije vratio, a kada ga je Mušić tužio, Radeljaš je na Općinskom sudu u Sarajevu rekao da nije uzeo novac.

---

Dugovanja ministra Radeljaša

Kako je CIN ranije pisao, Radeljaš je novac zarađivao prodajući tuđe nekretnine kao svoje, istu imovinu prodavao različitim kupcima, gradio kuću bez potrebnih dozvola, utajio porez, te oštetio budžet Općine Novi Grad čiji je vijećnik bio.

---

#### Radeljaševe prevare sa nekretninama

Alma Delizaimović, predsjednica Kluba Stranke demokratske akcije (SDA) u Skupštini BPK potpisala je inicijativu za Radeljaševu smjenu. Kaže da je pročitala sva CIN-ova istraživanja o Esedu Radeljašu i da su oni uticali na kreiranje mišljenja o njemu.

Inicijativa za Radeljaševu smjenu najprije je bila upućena premijeru BPK Emiru Okoviću. On kaže da je na Radeljaševu smjenu, iako je to politička odluka, uticao skup stvari, među kojima i njegova djela koja je CIN dokazao.

“Čitao sam ono oko imena Esad – Esed, pa smo vodili računa kod potpisivanja ove odluke”, kaže Oković.